

#1

**CHECK AGAINST DELIVERY**

*draft Statement for World Bank Country Director Zhu Xian  
at the TLDPM Opening Session (media) Tuesday 04 April 2006 AM*

**Sua Excelência Presidente Xanana Gusmao**

**Sua Excelência Primeiru Ministru Mari Alkatiri**

**Sua Excelência Presidente Parlamentu Francisco “Lu-Olo” Guterres**

**Sua Excelência Presidente Tribunal de Recurso Claudio Ximenes**

**Sua Excelência Provedor Sebastião Ximenes**

**Sr. Sukehiro Hasegawa, Representante Espesial Sekretariu Jerál**

**Membru Parlamentu Sira**

**Honradus Ministrus República Democrática de Timor-Leste**

**Distintus Delegadus**

**Membrus Imprensa**

Hau sente privilejiadu atu halibur hamutuk ho Imi dala ida tan iha sorumutu ida ne'e entre Timor-Leste no ni-nia Parseiru Dezenvolvimentu sira, ita nia sorumutu hanesan ne'e ba dala-nen desde Maiu 2002. Hateke ba fulan oin, hau hakarak hola biban ne'e atu fo parabéns ba Imi tomak ba okaziaun aniversáriu Restaurasaun Independénsia Timor-Leste nian ba dala-hat.

Iha tinan hat ne'e nia laran nudar nasaun independente ida, Timor-Leste hetan ona susesu iha hametin dame no estabilidade, nudar realizasaun notável no extra-ordináriu ida entre nasaun sira mak foin sai hosi konfliktu laran. Realizasaun ne'e nudar omenajen ida ba kbiit

no kompromisu ulun-boot sira Timor-Leste nian no matenek ni-nia povu nian. Iha momentu ne'ebé nasaun ne'e hein ni-nia eleisaun nasional ba dala-uluk mak halao mesa-mesak iha 2007, ami laran-metin katak nasaun ne'e sei kaer-metin nafatin ni-nia desizaun atu hametin estabilidade nudar objetivu prinsipal ida.

Molok hakat ba diskusaun ne'ebé halo ita hanoin barak or'sida lora ne'e, favor permite hau atu bolu atensaun ba realizasaun balun mak notável liu desde iha hasoru malu ba dala-ikus, no atu subliña dezafiu sira mak sei mosu mai enkuantu imi hakbesik daudauk ona ba Governu nia mandatu ba dala-uluk nia rohan desde Restauraun Independénsia.

Timor-Leste halo ona progresu impresionante iha harii arkitetura Estadu nian. Kuaze instituisaun hotu-hotu ne'ebé estabelese iha imi-nia Konstituisaun mak orasne'e hamriik ona, ne'ebé tulun fo fiskalizacion no ekilibriu nudar governu demokrátiku ida. Semana rua ona ohin, mak Gabinete Provedor loke ona ni-nia odamatan, hodi foo ba povu Timor-Leste biban ida atu hola parte iha suporta direitu sira ema nian no hola pozisaun ida hasoru korrupsaun. Ami fo parabéns ba Provedor tanba esforsu bem-susesidu atu fo hatene kona-ba ni-nia misaun ba sidadaun sira iha nasaun laran tomak, no ami hein atu hare'e rezultadu sira hosi ni-nia servisu. Hau mos hakarak temi kona-ba servisu Inspetor Jerál nian ne'ebé efetivu liu tan no ni-nia kontribuisaun ba responsabilidade no transparénsia hodi publika

rezumu sira ba ni-nia investigasaun sira iha website ida professional tebe-tebes.

Aprovasaun ba Lei Veteranus foin lalais ne'e nudar eventua importante ida iha Timor-Leste nia esforsu sira atu rekoñese veteranu rezisténsia nian, no nudar modelu ida entre nasaun sira mak foin sai hosi konfliktu laran. Ami foo louvor ba Gabinete Prezidente da Republika no Parlamentu ba prosesu rejistu no rekoñesimentu, ne'ebé nudar modelu ida entre nasaun sira mak foin sai hosi konfliktu laran. Relatóriu CAVR nian, "*Chega,*" nudar servisu monumental ida iha dokumentasaun sakrifisiu sira ne'ebé halo ona atu hetan independénsia no ami fo parabéns ba komisaun ne'e tanba halo ramata ona relatóriu ne'e.

Iha tinan kotuk nia laran, Governu adopta ona lejislasaun importante ida iha sektor mina-rai no harii ona Fundu Petroliferu ida, hodi hatudu desizaun atu evita utilizaun rekursu la prudente ne'ebé halo-susar nasaun sira seluk mak iha riku-soi natural wain. Nudar dalan seluk, Timor-Leste hili tihaona atu halot ni-nia riku-soi folin boot ne'e ba jersaun sira aban-bainrua, no – liu hosi relatóriu fulan tolu-tolu sira – atu foo hatene públiku sira kona-ba estatutu Fundu nian.

Timor-Leste harii ona baze importante sira atu hetan Objetivu Dezenvolvimentu Miléniu sira, ho labarik barak liu tan mak simu daudaun imunizasaun no ba daudaun eskola, no umakain barak liu tan mak iha ona asesu ba bee mos. Maiske nune'e, populasuun aumenta

lais liu fali rai sira seluk iha mundu, boot liu porsentu tolu tinan ida. Nudar rezultadu, rendimentu per kapita tuun tiha, no kiak iha possibilidade atu aumenta. Dezempregu mos sae tiha, liu-liu iha sidade sira no entre ema foin-sa'e sira. Tanba populasaun aumenta nafatin, sei iha presaan barak liu tan ba eskola sira no sentru saúde sira atu foo servisu ba populasaun, liu-liu iha área rural sira, no sei iha nesesidade iha boot liu tan ba empregu sira atu foo servisu ba ema foin-sa'e sira mak tama iha forsa-traballu tina-tinan.

Timor-Leste iha ona kbiit atu hasae taxa kresimentu ekonómiku porsentu nen ba walu tinan ida ne'ebé presiza atu hakuran kiak no hamoris empregu sira. Nasaun ne'e goza riku-soi mak susar atu hetan hodi orsamentu ida mak aumenta daudaun atu foo ba estimula kresimentu ekonomiku no halakon kiak, enkuantu komprometidu nafatin ba ni-nia politika poupansa prudente. Hodi hola vantajen ba biban ne'e, Governu permite aumentu ida ba orsamentu, liu-liu ba investimentu capital hanesan lurón sira, eskola, no hospital sira, no ho atensaun ida mak aumenta nafatin ba distritu sira. Bainhira gasta didiak, no lalais, orsamentu dezenvolvimentu kapital bele natón atu tulun emakiak sira no hamoris empregu prazu badak ba ema sira mak la iha servisu. Ami hakarak halo diskusaun ida ohin kona-ba dalan sira atu hadia liu tan ezekusaun orsamentu no aumenta servisu mak halo tihaona atu haruka gastus sira direktamente ba programa sira atu hakuran kiak.

Durante prazu naruk, esforsu hakuran kiak no hamoris empregu sei depende ba haburas dezvoltimentu negósiu iha Timor-Leste. Ami simu diak kriaun instituisaun sira ba investimentu rai-laran no estranjeiru no apoia imi atu akompaña esforsu sira ne'e ho prosedimentu simples sira ba rejistu negósiu atu atrai negósiu sira – negósiu ema Timor no mos estranjeiru nian – atu moris no buras iha Timor-Leste. Ami hein atu halo diskusaun produtivu ida kona-ba dalan sira atu estimula dezvoltimentu empreza privadu sira mak dinámiku iha imi-nia nasaun.

Enkuantu nasaun ne'e hein ni-nia eleisaun nasional ba dala-uluk nudar nasaun independente, ita selebra eleisaun *suco* sira mak ramata iha fulan Outubru tinan kotuk. Ami aten-boot liu-liu tanba feto barak mak tama iha politika lokal sira no hein katak inkluzividade ne'e sei refleto mos iha nivel nasional. Abordajen ba eleisaun subliña nesidade ba instituisaun forte no independente sira, no ami fo aten-brani ba Governu atu tuir ezemplu Fundu Petroliferu no Provedor sira iha lansamentu prosesu konsultivu ida haleu redasaun lei eleitoral.

Ami hein atu halo diskusaun ida vibrante ohinloron hodi buka dalan sira atu oinsá imi-nia Parseiru Dezvoltimentu hotu-hotu bele apoia nafatin imi-nia esforsu sira atu halakon kiak no hadia moris povu Timor nian.

Obrigadu.